

**Sud Bosne i Hercegovine**
Суд Босне и Херцеговине**Broj S1 3 Iž 051800 25 Iž**
Sarajevo, 17.04.2025. godine**IZVORNIK**

Sud Bosne i Hercegovine, u apelacionom vijeću sastavljenom od sudija Mirsade Džindo, kao predsjednika vijeća, Zvezdane Antonović i Redžiba Begića, kao članova vijeća, odlučujući o žalbi Šimunović Ane iz V., ul. ..., izjavljenoj protiv Odluke o dodjeli mandata slijedećem kvalificiranom kandidatu, broj 06-1-07-1-16/25 od 05.03.2025. godine, na nejavnoj sjednici, održanoj dana 17.04.2025. godine, donio je

R J E Š E N J E

Žalba se odbija

O b r a z l o ž e n j e

Odlukom Centralne izbore komisije Bosne i Hercegovine, broj 06-1-07-1-16/25 od 05.03.2025. godine dodijeljen je mandat vijećnika u Općinskom vijeću Vitez, Žuljević Milku kao slijedećem kvalificiranom kandidatu, sa liste političkog subjekta HDZ BiH, HSS STJEPANA RADIĆA; HKDU-BIH, za Lokalne izbore 2024. godine. Stavom drugim odluke je konstatovano da se imenovanom dodjeljuje mandat iz razloga što se smatra da je Šimunović Ana, kandidatkinja na listi političkog subjekta HDZ BiH, HSS STJEPANA RADIĆA; HKDU-BIH, za Lokalne izbore 2024. godine za Općinsko vijeće Vitez, odustala od mandata za vijećnika za Općinsko vijeće Vitez, zbog nedostavljanja Izjave o prihvatanju/odbijanju mandata u Općinskom vijeću Vitez. Trećim stavom je navedeno da je Žuljević Milko dužan postupiti po odredbi člana 1.3a stav 3. Izbornog zakona BiH i u roku od 7 dana od primitka Izjave o prihvatanju /odbijanju mandata ist čitko popuniti i dostaviti Centralnoj izbornoj komisiji (Središnjem izbornom povjerenstvu) BiH.

Protiv navedene odluke žalbu je podnijela Ana Šimunović zajedno sa uz prijedlogom za povrat u pređašnje stanje. U žalbi navodi da je po dobijanju obavijesti broj: 06-1-07-1-16/25 od 16.01.2025.godine uz koju je dostavljen obrazac izjave, istu popunila i blagovremeno dostavila Centralnoj izbornoj komisiji BiH putem Općinske izborne komisije Vitez, jer su joj iz navedene komisije rekli da je procedura takva, odnosno da sve ide preko Općinske izborne komisije. Ističe da je navedenu izjavu

predala 22.01.2025. godine, a istu je zaprimila članica navedene komisije Jelena Skopljak, pošto se predsjednica nalazila na bolovanju. Nadalje navodi da nije znala da članica komisije izjavu nije prosljedila Centralnoj izbornoj komisiji BiH. Uz žalbu dostavlja Izjavu o prihvatanju mandata i izjavu Jelene Skopljak od 07.03.2025. godine. Ističe da ukoliko Centralna izborna komisija BiH ne prihvati prijedlog za povrat u pređašnje stanje ulaže žalbu Apelacionom odjelu suda Bili jer joj je nezakonito oduzet mandat.

U odgovoru na žalbu Centralna izborna komisija BiH (dalje: CIK BiH) je pistakla da je žalba neosnovana i predložila da se ista odbije.

Žalba nije osnovana.

Iz stanja spisa proizlazi da CIK BiH dana 16.01.2025. godine donijela Odluku, broj: 06-1-07-1-16/25 u kojoj je stavom prvim utvrđena činjenica o prestanku mandata Križanović Ranka, vijećnika u Općinskom vijeću Vitez, i dodjeli mandata. Šimunović Ani, sljedećoj kvalificiranoj kandidatkinji sa liste političkog subjekta HDZ BIH, HSS STJEPANA RADIĆA, HKDU-BIH za Lokalne izbore 2024. godine. Stavom 2. i 3. dispozitiva navedene Odluke navedeno je da je Šimunović Ana dužna postupiti u skladu sa članom 1.3a stav 3. Izbornog zakona BiH i u roku od sedam dana od dana prijema Izjave o prihvaćanju/odbijanju mandata istu čitko popuniti i dostaviti Centralnoj izbornoj komisiji BiH. Navedenu Odluku zajedno sa Izjavom o prihvaćanju/odbijanju mandata žaliteljica je zaprimila dana 20-01.2025. godine što je vidljivo iz poštanske povratnice.

Članom 1.3a Izbornog zakona Bosne i Hercegovine određeno je da je izabrani nosilac mandata, izabran na neposrednim i posrednim izborima, dužan da potpiše izjavu kojom odbija ili prihvaća mandat na obrascu koji propisuje Centralna izborna komisija BiH u roku od sedam dana od prijema izjave.

Članom 15. stav 1. i stav 2. Uputstva o dodjeli i prestanku mandata određeno je da nakon što Centralna izborna komisija BiH donese odluku o utvrđivanju prestanka mandata izabranom članu organa vlasti i dodjeli mandata narednom kvalificiranom kandidatu, odluke se dostavljaju strankama u postupku. Kvalificirani kandidat će uz odluku dobiti i obrazac izjave, koji propisuje Centralna izborna komisija BiH. kojom prihvaća ili odbija mandat, a koji će uredno popuniti i dostaviti Centralnoj izbornoj komisiji BiH u roku od sedam (7) dana od dana prijema odluke i Izjave. Ukoliko prihvati mandat. Centralna izborna komisija BiH će, po pravosnažnosti odluke i u skladu sa članom 9.10. 9.12h. 10.8. 10.17. 11.8 i 11.14, odnosno članom 13.6 Izbornog zakona BiH, izvršiti dodjelu mandata sljedećem kvalificiranom kandidatu sa liste i izdati Uvjerenje o dodijeljenom mandatu, u skladu sa članom 2.9 stav 1. tačka 10) Izbornog zakona BiH.

Iz stanja spisa proizlazi da Šimunović Ana navedenu Izjavu nije dostavila CIK BiH u

propisanom roku, iz kojih razloga je na osnovu člana 1.3a stav 3., a u vezi člana 13.6 stav 1. Izbornog zakona BiH, CIK BiH odlučila da će, po pravosnažnosti odluke broj: 06-1-07-1-16/25 od 05.03.2025.godine, mandat vijećnika u Općinskom vijeću Vitez biti dodijeljen Žuljević Milku, sljedećem kvalificiranom kandidatu sa liste političkog subjekta HDZ BIH. HSS STJEPANA RADIĆA. HKDU-BIH.

Neosnovani su navodi podnositeljice žalbe *"da je spornu izjavu danu 22.01.2025.godine predala Općinskoj izbornoj komisiji Vitez a da je istu zaprimila članica OIK Vitez Jelena Skopljak jer su joj u Općinskoj izbornoj komisiji Vitez rekli da procedura ide preko OIK i da ne šalje ništa direktna Centralnoj izbornoj komisiji BiH"*, iz razloga što je je u stavu 3. dispozitiva odluke o prestanku mandata i dodjeli mandata sljedećem kvalifikovanom kandidatu broj: 06-1-07-1-16/25 od 16.01.2025.godine jasno navedeno da je Šimunović Ana DUŽNA postupiti u skladu sa članom 13a stav 3. Izbornog zakona BiH i u roku od sedam dana od dana prijema Izjave o prihvatanju/odbijanju mandata istu čitko ispuniti i **dostaviti Centralnoj izbornoj komisiji BiH.**

Isto tako, neosnovanost žalbenih navoda proizilazi iz svega naprijed navedenog, posebno imajući u vidu činjenicu da je Općinska izborna komisija Vitez dostavila izjašnjenje u kojem navodi da nije zaprimila izjavu Ane Simunović o prihvatanju mandata, te da ni podnositeljica žalbe, a ni članica Općinske izborne komisije Vitez nisu dostavili dokaz da je sporna izjava o prihvatanju mandata zaista zaprimljena u Općinsku izbornu komisiju Vitez sa datumom 22.01.2025. godine, kako se to u žalbi navodi, kako bi takva izjava mogla da bude predmet razmatranja nepravilnog postupanja orgaana-OIK Vitez, kada zaprimi podnesak za koji nije nadležna..

Obzirom na navedeno, po ocjeni ovog vijeća, izjavljena žalba protiv pobijane odluka Centralne izborne komisije BiH je neosnovana, pa je istu primjenom odredbe člana 81 stav 1 u vezi sa članom 54 stav 1 Zakona o upravnim sporovima BiH („Službeni glasnik BiH“ br. 19/02, 88/07, 83/08 i 74/10) valjalo odbiti.

**PREDSJEDNIK VIJEĆA
SUDIJA
Mirsada Džindo**